

Nunat Avannarliit Killit Siunnersuisoqatigiiffiata kaammattuutitut aalajangersagaanik nr. 1/2010-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Kisimiillutik pilersuisut atugaasa pitsanngorsarneqarnissaannut taperseeqqullugit Savalimmiuni Naalackersuisut, Kalaallit Nunaanni Namminersorlutik Oqartussat aamma Islandimi Naalackersuisut Nunat Avannarliit Killit Siunnersuisoqatigiiffiannit kaammattorneqarput. Ilaatigut isumassarsianik, ilisimasanik aamma misilittakkanik paarlaasseqatigiinnikkut aammalu ilaqutariit kisimiittunik pilersuisullit atugaasa qanoq pitsaanerpaamik pitsanngorsarneqarsinnaanerannik siunnersuutitik saqqummiussinikkut naalackersuisut pineqartut suleqataanissaat siunnersuisoqatigiit kaammattuutigaat. Alloriarnertut siullertut nunani avannarlerni killerni isumaginninnikkut naalackersuisuusut isummanik iluatsittumillu suliniutinik paarlaasseqatigiiffiusumik ataatsimeersuartitsinissamik kaammattorneqarput. (Inatsisartut Siulittaasuut Josef Motzfeldt, Inuit Ataqatigiit)

Akissuteqaat

(Isumaginninnermut Naligiissitaanermullu Naalackersuisoq)

Siullermeerinnineq

Nunat Avannarliit Killit Siunnersuisooqatigiivisa kaammattuutitut aalajangersakkakkut tassuuna Nunani Avannarlerni Killerni anaananut kisimiittunut atugassarititaasut sammilerpaat.

Naalackersuisut isumaqarput inuiaqatigiit tamarmik atugarissaalernissaat pingaaruteqartoq, tamannalu aamma ilaqutariinnut ataasiinnarmik pilersuisulinnut atuuppoq.

Naalackersuisooqatigiinnissamik isumaqatigiissummi allassimasutut, Naalackersuisut ungasinnerusoq eqqarsaatigalugu, ilaqutariinnut inunnullu ataasiakkaanut atugarissaalersitsisussanik suliniuteqarnissamik kissaateqarput. Aammattaaq allassimavoq immikkut tapersersortariallit tapersersorneqarnissaat qularnaarneqassasoq. Tapersersuineq aallaavittut pisariaqartitsinerup paasineqarnerani sapinngisamik siusissukku pisassaaq.

Siunissami atugarissaarnissap pigissaarnissallu qularnaarneqarnissaa siunertaralugu Naalackersuisut 2009-mi Akileraartarneq Atugarissaarnerlu pillugit Isumalioqatigiissitamik pilersitsippot, ilaatigut isumaginninnermi sullissinermik kiisalu akileraarutit akitsuutillu ataqatigiinnerannik tamarmiusumik misissueqqissaartussamik.

Aningaasaqarnikkut atugarissaannginnerpaat inuuniarnikkut atugaasa pitsanngorsarneqarnissaat kiisalu inuiaqatigiinni isertitatigut assigiinngissutsit assigiissaarneqarnissaat siunertaralugu misissueqqissaarnerit taakku aallaavigalugit Isumalioqatigiissitaq siunnersuuteqassaaq.

Taamaattumik kalaallit inuiaqatigiit atugarissaarnissaat Naalackersuisunit sammineqareerpoq, tamatumani aningaasaqarnikkut atugarissaannginnerpaat, taakkununga ilanngullugit pilersuisut kisimiittut immikkut eqqumaffigineqarlutik, inuiaqatigiinni aningaasaqarnikkut atugarissaannginnerpaanut ilaanerat najoqqutaralugu.

Pilersuisut kisimiittut, pingaartumillu pilersuisut kisimiittut isertitakitsut aningaasaqarnikkut inuttullu immikkut unammisassaqarput, tassami taakku isumaginninnikkut aqqissuussinermi ikiorserneqarnissamut immikkut pisariaqartitsimmata, ilaqtariinnut isertitaqarniarqoq inersimasooq ataasiinnaammat.

Nunatsinni isumaginninnermi inatsisini tunniuttakkani amerlasuuni isertitat akileraaruteqaataasussat apeqqaasarput, ass. meeqqanut tapiissutit ineqarnermullu tapiissutit pineqartillugit. Tunniuttakkat taakku pingaartumik kisimiillutik perorsaasunut iluaqutaassapput.

Nunani avannarlerni killerni suleqatigiinneq Naalakkersuisunit qutsatigineqarpoq, kiisalu Island Savalimmiullu peqatigalugit pineqartuni iluaqutaasinnaasuni tamani isumassarsianik misilittakkanillu paarlaasseqatigiittarnissaq ilungersuutigineqarluni.

Kisimiilluni pilersuisuusunut tunngatillugu immikkut ajornartorsiuteqarsinnaanera Naalakkersuisut isumaqatigaat, tamatumani Nunat Avannarliit Killiit isumassarsianik misilittakkanillu paarlaasseqatigiilluarsinnaallutik. Taamaattumik Naalakkersuisut sammisaq qaqilerniarpaat kiisalu kisimiillutik pilersuisut pillugit ataatsimeersuartariaqarneq eqqartorniarlugu, Nunani avannarlerni killerni suliaasaqarfimmi tamanna pissutissaqalerpat.

Taamatut oqaaseqarlutik Naalakkersuisut Nunat Avannarliit Killiit Siunnersuisooqatigiivinit aalajangiiffigisassatut siunnersuut pillugu Inatsisartut oqallinnissaat qilanaaraat.